



**RELACION**  
**PËR**  
**PROJEKTVENDIMIN**  
**MBI**

**RREGULLAT PËR NUMËRIMIN DHE VLERËSIMIN E VOTAVE NGA JASHTË,**  
**DOKUMENTACIONIN PËRKATËS DHE MËNYRËN E PLOTËSIMIT TË TIJ, SI**  
**DHE TABULIMIN E REZULTATIT TË VOTIMIT NGA JASHTË**

**I. VLERËSIMI I LIGJSHMËRISË DHE HARMONIZIMI ME LEGJISLACIONIN NË FUQI**

Në mbështetje të nenit 20, pika 1, shkronja “dh”, të ligjit nr. 10019, “Kodi Zgjedhor i Republikës së Shqipërisë”, të ndryshuar, përcaktohet kompetenca e Komisionit Rregullator për të shqyrtuar dhe miratuar projektaktet me karakter normativ, të përgatitura nga administrata e KQZ-së ose nga anëtarët e tij, për rregullat për regjistrimin e votuesve nga jashtë vendit.

Neni 25/1, pika 1 i Kodit Zgjedhor parashikon se KQZ-ja nuk mund të pranojë dhe përfshijë në numërim asnjë fletë votimi të mbërritur pas orarit të përcaktuar në Kodin Zgjedhor për mbylljen e votimit në qendrat e votimit, me përjashtim të zarfeve me fletë votimi të cilat kanë vulën e hyrjes ose çdo shënim tjetër për këtë gjë në territorin e Republikës së Shqipërisë deri në orën e mbylljes së votimit brenda vendit, sipas këtij Kodi.

Neni 25/1, pika 4 i Kodit Zgjedhor parashikon se fletët e votimit të dërguara nga zgjedhësit jashtë vendit dhe të administruara numërohen në ambientet e KQZ-së. Fletët e votimit të dërguara nga zgjedhësit jashtë vendit në momentin e mbërritjes në KQZ regjistrohen në një regjistër të posaçëm dhe ndahen sipas zonës zgjedhore të vendbanimit më të fundit të zgjedhësit para largimit nga Shqipëria. Procesi i numërimit të tyre fillon në të njëjtën moment që fillon numërimi i kutisë së parë me fletë votimi të zonës zgjedhore përkatëse, si dhe vlerësimi i tyre kryhet nga administrata e KQZ-së dhe tabulohen në tabelën e rezultateve të zonës zgjedhore përkatëse.

Komisioni Rregullator, me propozimin e Komisionerit Shtetëror të Zgjedhjeve, përcakton me akt nënligjor dokumentacionin, mënyrën e plotësimit të tij si dhe çdo aspekt tjetër për administrimin, vëzhgimin e procesit të numërimit, numërimit, vlerësimin e votës dhe tabelimin e rezultatit zgjedhor.

Duke vlerësuar nga pikëpamja e objektit që trajton ky projektvendim, vlerësohet nga ana e ligjshmërisë se është në kompetencë të Komisionit Rregullator për ta shqyrtuar.

**II. PËRMBLEDHJE SHPJEGUESE E PËRMBAJTJES SË PROJEKTAKTIT**

Ky projektvendim është hartuar në mbështetje të ndryshimeve më të fundit të ligjit nr. 10019, datë 29.12.2008 “Kodi Zgjedhor i Republikës së Shqipërisë”, të ndryshuar, me qëllim përcaktimin e rregullave dhe dokumentacionit në lidhje me administrimin, vëzhgimin e procesit

të numërimit, numërimin, vlerësimin e votës nga jashtë vendit dhe tabulimin e rezultatit zgjedhor për zgjedhjet për Kuvend të vitit 2025.

Projektakti rendit parime të përgjithshme, të cilat janë shtyllat ku do të mbështetet procesi i numërimit dhe vlerësimit të votave nga jashtë dhe përfshirja e tyre në rezultatin e zgjedhjeve.

Në kreun I të projektvendimit parashikohen parimet si më poshtë vijon:

- 1. Procesi i numërimit dhe vlerësimit të votave të votuesve nga jashtë territorit të Republikës së Shqipërisë respekton parimet e ligjshmërisë, paanërisë, transparencës dhe sigurisë për votën.*
- 2. Parimi i diskrecionit: Komisioni Qendror i Zgjedhjeve ka të drejtën të veprojë me diskrecion brenda limiteve të përcaktuara nga Kushtetuta dhe Kodi Zgjedhor, me qëllim sigurimin dhe mbrojtjen e votës të shtetasve shqiptarë jashtë vendit. Diskrecioni ushtrohet në mënyrë që të përmirësohen proceset dhe të adresohen situata të paparashikuara për të garantuar realizimin e votës.*

Në kreun II parashikohen rregulla të përgjithshme të përcaktuara në ligj sa i takon procesit të administrimit, numërimit dhe vlerësimit të votave nga jashtë të dërguara nga zgjedhësit jashtë territorit të Republikës së Shqipërisë, ku përcaktohet se Komisioni Qendror i Zgjedhjeve administron dhe numëron çdo fletë votimi që ka hyrë në territorin e Republikës së Shqipërisë deri nëse ka hyrë në territorin e Republikës së Shqipërisë pas orarit të mbylljes së votimit brenda vendit pranohet nga KQZ dhe administrohet sipas rregullave të përcaktuara në këtë vendim. Orari i hyrjes në Republikën e Shqipërisë verifikohet nëpërmjet vulës së hyrjes në zarfin e operatorëve të shërbimit posta.

Numërimi dhe vlerësimi i fletëve të votimit të dërguara nga zgjedhësit jashtë territorit të RSH do të kryhet në KQZ një ambient të caktuar nga Komisioni Qendror i Zgjedhjeve. Procesi i numërimit, vlerësimit të votave nga jashtë dhe tabulimit të rezultatit zgjedhor kryhet nga administrata e KQZ – së.

Procesi i numërimit fillon në të njëjtin moment që fillon numërimi i kutisë së parë me fletë votimi të zonës zgjedhore përkatëse. Numërimi, vlerësimi i votave nga jashtë dhe tabulimi i rezultatit kryhet veçmas për çdo zonë zgjedhore.

Në këtë kre parashikohet e drejta e subjekteve zgjedhore, medias, organizatave të shoqërisë civile për të monitoruar dhe vëzhguar procesin e numërimit dhe vlerësimit të votës nga jashtë, në përputhje me dispozitat përkatëse të Kodit Zgjedhor, këtë vendim, si dhe me aktet e tjera nënligjore të Komisionit Qendror të Zgjedhjeve.

Në kreun III parashikohen rregulla të posaçme që lidhen me Përgatitjen për Numërimin dhe Vlerësimin e Votave nga Jashtë, personelit përgjegjës për numërimin dhe vlerësimin e votave, dhe në lidhje me dërgimin e dokumentacionit zgjedhor të votimit nga jashtë në ambientet e VNVJ.

Në zbatim të nenit 93, pikës 1 dhe 2, të Kodit Zgjedhor me titull “Vendndodhja e qendrave të votimit, Selive të KZAZ-ve dhe Vendeve të Numërimit të Votave”, parashikohet detyrimi i Prefektit të Tiranës për t’i paraqitur Komisionit Qendror të Zgjedhjeve listën e plotë të objekteve brenda territorit të qarkut jo më vonë se 60 ditë para datës së zgjedhjeve.

Vendi i Numërimit të Votave nga Jashtë, nga këtu e në vijim referuar si “VNVJ”. KQZ organizon VNVJ në përputhje me parashikimet e nenit 94 të KZ me titull “Vendndodhja dhe përgatitja e Vendeve të Numërimit të Votave”. Në VNVJ lejohet të jenë të pranishëm vetëm:

- a) Personeli/stafi i i KQZ ;
- b) Përfaqësuesit e akredituar të medias;
- c) Vëzhguesit e subjekteve zgjedhore;
- d) Vëzhguesit e tjerë të akredituar;
- e) Kandidatët; të cilët duhet të jenë të pajisur me dokument identifikimi për të verifikuar identitetin e tyre, si dhe në VNVJ instalohen sisteme të monitorimit me kamera të ambientit në VNVJ, si dhe procesit të numërimit dhe të vlerësimit të votave, të njëjta me ato që vendosen në VNV në votimin brenda vendit.

Në lidhje me personelin përgjegjës për numërimin dhe vlerësimin e votave, projektakti parashikon rregulla në lidhje me numërimin dhe vlerësimin e votave, tabulimin e rezultatit të votimit nga jashtë, si dhe përbërjen dhe funksionimin e grupeve të numërimit.

Numërimi dhe vlerësimi i votave nga jashtë kryhet nga Komisioni i Numërimit dhe Vlerësimit të Votës nga Jashtë, referuar në vijim si KNVJ, si dhe Grupe të Numërimit të Votave nga Jashtë, referuar si GNVJ.

KNVJ përbëhet nga tre anëtarë të caktuar nga KËZ, jo më vonë se 20 ditë përpara datës së zgjedhjeve. Anëtarët e këtij Komisioni duhet të plotësojnë kushtet dhe kriteret sikurse ato për emërimin e anëtarit të KZAZ/ Komisioni Zonal i Administrimit Zgjedhor, me përjashtim të kushtit të vendbanimit në zonën zgjedhore përkatëse. Shkarkimi i anëtarit të KNVJ do të bëhet për të njëjtat shkaqe që vlejné për shkarkimin e anëtarit të KZAZ.

GNVJ përbëhet nga dy anëtarë të caktuar nga KQZ. Një nga anëtarët e GNVJ caktohet me deyrën e sekretarit. Vendimi për caktimin e anëtarëve të GNVJ merret jo më vonë se 10 ditë përpara datës së zgjedhjeve. Anëtarët e GNVJ duhet të plotësojnë kushtet dhe kriteret sikurse ato të emërimit të anëtarit të Grupit të Numërimit të Votave për votimin brenda vendit, me përjashtim të kushtit të vendbanimit në zonën zgjedhore përkatëse. Shkarkimi i anëtarit të GNVJ do të bëhet për të njëjtat shkaqe që vlejné për shkarkimin e anëtarit të GNV. Për çdo zonë zgjedhore caktohet veçnas GNVJ. Në zona zgjedhor ku numri i votuesve nga jashtë është më i madh se 5000, caktohen jo më pak se dy grupe numërimi, që i kryejné detyrat njëri pas tjetrit, jo në të njëjtën kohë, sipas rradhës së caktuar nga KQZ.

Partia më e madhe e shumicës parlamentare dhe partia më e madhe e opozitës parlamentare kanë të drejtë të caktojnë nga një vëzhgues pranë tavolinës së çdo GNVJ. Anëtarët vëzhgues të GNVJ kanë të drejtë vetëm të monitorojné dhe vëzhgojnë procesin e numërimit dhe vlerësimit të votave, si dhe të shënojnë komentet e tyre në Tabelën e Rezultatit të GNVJ përkatëse. Anëtarët e GNVJ të caktuar në turnin e parë duhet të paraqiten në VNVJ, në tavolinën përkatëse të numërimit, jo më vonë se ora 21:00 e ditës së votimit. Përfaqësuesit e partive parlamentare në KQZ kanë të drejtë të përjashtojné nga qënia anëtarë i KNVVJ, ose i GNVJ çdo person të caktuar në atë detyrë në rast se kanë dyshime për profesionalizmin dhe paanësinë e tij. Këtë të drejtë ato e ushtrojnë vetëm një herë.

Në lidhje me dërgimin e dokumentacionit zgjedhor të votimit nga jashtë në ambientet e VNVJ-së, në projektakt parashikohet se dokumentacioni zgjedhor i votimit nga jashtë i administruar sipas përcaktimeve të vendimit të Rregullatorit nr. 13 datë 12.11.2024 “Për miratimin e rregullave për procedurën e votimit nga jashtë” dërgohet/trasportohen në ambientet e VNVJ jo më vonë se ora 21.00 e ditës së votimit.

Për dorëzimin në VNVJ të Kutive të Votimit nga Jashtë, Kutive të Posaçme të Votimit nga Jashtë, Kutive Rezervë të Votimit nga Jashtë dhe Kutive të Posaçme Rezervë të Votimit nga Jashtë, referuar në vijim të gjitha si Kutitë, mbahet një **Procesverbal i Dorëzimit të Kutive të Dokumentacionit Zgjedhor nga Jashtë** midis të paktën një anëtari të KNVVJ dhe personelit të KQZ që është ngarkuar me dorëzimin e kutive përkatëse. Kopje të këtij procesverbali marrin KNVVJ, KQZ, si dhe vëzhguesit e partive parlamentare.

Përpara dorëzimit të Kutive nga KQZ tek KNVVJ, KQZ duhet të bëjë indeksimin e çdo kutie me numra natyror të njëpasnjëshëm duke filluar nga numri një vecmas për çdo lloj/kategori kutie.

Indeksi fillon në radhë sipas qarqeve sikurse janë numërtuar qendrat e votimit të votimit brenda vendit. **Numri i indeksit vendoset** në njërin prej faqeve anësore të çdo Kutie.

Nëse gjatë marrjes në dorëzim të kutive rezultojnë se kodet e vulave të sigurisë nuk përputhen me ato të shënuara gjatë mbylljes së tyre, atëherë kutia përkatëse vlerësohet si “Kuti e Parregullt” dhe mbi të **vendoset shënimi “Kuti e Parregullt”**, e cila nuk i jepet GNVJ për numërim, apo vlerësim të votave, por i nënshtrohet një hetimi administrativ sipas përcaktimeve të neneit 136 dhe 138 të Kodit Zgjedhor.

Transportimi i Kutive nga ambienti ku ato ruhen dhe administrohen sipas vendimit të Rregullatorit nr. 13 datë 12.11.2024 “Për miratimin e rregullave për procedurën e votimit nga jashtë” për tek VNVJ bëhet i shoqëruar nga Policia e Shtetit.

Në kreun IV të këtij projektvendimi, përcaktohen rregulla lidhur me numërimin dhe vlerësimin e votës nga jashtë vendit, procedurën për numërimin dhe vlerësimin e dokumentacionit zgjedhor të administruar në Kutinë e Votimit nga Jashtë, procedurën për numërimin dhe vlerësimin e dokumentacionit zgjedhor gjendur në Kutinë e Posaçme të Votimit nga Jashtë, procedurën për numërimin dhe vlerësimin e dokumentacionit zgjedhor gjendur në Kutinë Rezervë të Votimit nga Jashtë, procedurën për numërimin dhe vlerësimin e dokumentacionit zgjedhor gjendur në Kutinë e Posaçme Rezervë të Votimit nga Jashtë.

Në lidhje me procedurën për fillimin e numërimit dhe vlerësimin të votës nga jashtë vendit, në projektakt parashikohet se kur KQZ, në bazë të njoftimit të marrë nga KZAZ, apo KZAZ-të e zonës zgjedhore përkatëse konstaton se ka filluar numërimi i kutisë së parë të votimit për atë zonë zgjedhore, fillon menjëherë numërimin dhe vlerësimin e votave nga jashtë për atë zonë zgjedhore. Sekretari i KZAZ ka detyrimin të njoftojë menjëherë KQZ në momentin kur fillon numërimi i kutisë së parë të votimit brenda vendit. Njoftimi bëhet nëpërmjet platformave elektronike të komunikimit në adresat e përcaktuara nga KQZ. Procesi i numërimit dhe vlerësimin të dokumentacionit zgjedhor të administruar në llojet përkatëse të kutive fillon nga kutia e indeksuar me numrin 1.

Në lidhje me procedurën për numërimin dhe vlerësimin e dokumentacionit zgjedhor të administruar në Kutinë e Votimit nga Jashtë, projektakti parashikon Sekretari i GNVJ vendos mbi tavolinën e numërimit Kutinë e Votimit nga Jashtë dhe lexon kodet e vulave të sigurisë me të cilat është mbyllur kjo kuti. Verifikohet nëse kodet e vulave të sigurisë janë të njëjta me ato të mbylljes së kutisë dhe i shënon ato në **Tabelën e Rezultatit të GNVJ** përkatëse. Nëse ka mospërputhje, atëherë GNVJ njofton menjëherë KNVVJ e cila merr vendim për përfshirjen ose jo në numërim të asaj kutie. Kundër këtij vendimi mund të bëhet ankim sipas procedurave të përcaktuara në nenin 124 të Kodit Zgjedhor. Pasi hap Kutinë e Votimit nga Jashtë sekretari i GNVJ në prani të anëtarit tjetër si dhe të vëzhguesve nxjerr nga kjo kuti Zarfat e Jashtëm të cilët kanë të shënuar Kodin Unik dhe i numëron ata. Numri i tyre shënohet në **Tabelën e Rezultatit të GNVJ**.

GNVJ nxjerrë nga secili prej Zarfeve të Jashtëm, zarfin që përmban fletën e votimit dhe shënon në **Tabelën e Rezultatit të GNVJ** numrin e zarfeve me fletë votimi të gjendura brenda Zarfeve të Jashtëm.

Nëse pas hapjes së Zarfit të Jashtëm konstatohet se mungon zarfi ku futet fleta e votimit, apo fleta e votimit gjendet jashtë këtij zarfi, apo në Zarfin e Jashtëm mungon Kodi Unik, atëherë GNVJ e shënon gjetjen në **Tabelën e Rezultatit të GNVJ**. Në këtë rast vota është e pavlefshme. Dokumentacioni zgjedhor i këtij i rasti administrohet në një zarf të veçantë, me përjashtim të rasteve të parashikuara në pikën 5 të këtij kreu.

Zarfet brenda të cilëve janë fletët e votimit, pasi janë nxjerrë nga Zarfet e Jashtëm, përpara se të numërohen dhe të vlerësohen, vendosen në një kuti plastike transparente dhe më pas përzihen po brenda kësaj kutie. Kutia pozicionohet në mënyrë të tillë që të mund të shikohet nga vëzhguesit. Procesi i numërit dhe vlerësimit të votave kryhet fillimisht për subjektet zgjedhore, parti politike ose koalicionin i partive dhe më pas për kandidatët e preferuar.

Sekretari i GNVJ nxjerr me radhë nga secili zarf që mban fletën e votimit këtë të fundit dhe lexon me zë emrin e subjektit zgjedhor/parti politike/koalicion për të cilin është bërë shënimi përkatës në këtë fletë votimit. Njëkohësisht fleta e votimit shfaqet në një monitor për tu parë nga personat e tjerë të pranishëm në VNVJ. Vlerësimi i fletës së votimit bëhet sipas parashikimeve të Kreut III.8 të këtij akti. Nëse në zarfin e fletës së votimit mungon fleta e votimit, rasti shënohet në **Tabelën e Rezultatit të GNVJ**.

Nëse ndonjë prej anëtarëve të GNVJ ka kontestime në lidhje me vlerësimin e fletës së votimit, ky kontestim shënohet në **Tabelën e Rezultatit të GNVJ**. Në pjesën mbrapa të fletës së votimit, nga faqja që nuk janë emrat e subjekteve zgjedhore, sekretari shënon fjalën “E kontestuar”.

Pasi përfundon numërimi dhe vlerësimi i fletëve të votimit sipas këtij projektakti, Sekretari i GNVJ plotëson **Tabelën e Rezultatit të GNVJ** duke shënuar numrin e votave të vlefshme, numrin e votave të pavlefshme, numrin e votave për çdo subjekt zgjedhor, si dhe numrin e votave të kontestuara.

Fletët e votimit të numëruara dhe të vlerësuara nënshkruhen nga anëtarët e GNVJ në faqen që nuk janë emrat e subjekteve zgjedhore. (*Variant: Ju vendoset një vulë*). Pasi GNVJ ka shënuar në **Tabelën e Rezultatit të GNVJ** rezultatin e votimit për subjektet zgjedhore, parti politike dhe koalicionet partive, fillon numërimin e dhe vlerësimin e votave preferenciale për kandidatët për deputet. Numri i votave për çdo kandidat shënohet gjithashtu në **Tabelën e Rezultatit të GNVJ**. Fletët e votimit për çdo subjekt zgjedhor, apo kandidatë për deputet që ka marrë votë preferenciale vendosen në zarfa të veçantë.

Në përfundim të procesit të vlerësimit dhe të numërimit të fletëve të votimit sipas këtij kreu, GNVJ i fut ato në Kutinë e Votimit nga Jashtëm këtë kuti vendosen edhe Zarfat e Jashtëm. Kutia mbyllet me vula sigurie me kod. Të dhënat e kodeve të vulave të sigurisë shënohen në **Tabelën e Rezultatit të GNVJ**.

Në lidhje me procedurën për numërimin dhe vlerësimin e dokumentacionit zgjedhor gjendur në Kutinë e Posaçme të Votimit nga Jashtë, në projektakt parashikohet se sekretari i GNVJ vendos mbi tavolinën e numërimit **Kutinë e Posaçme të Votimit nga Jashtë** dhe lexon kodet e vulave të sigurisë me të cilat është mbyllur kjo kuti. Verifikohet nëse kodet e vulave të sigurisë janë të njëjta me ato të mbylljes së kutisë dhe i shënon ato në Procesverbalin e Votimit nga Jashtë të Zonës zgjedhore përkatëse. Nëse ka mospërputhje, atëherë GNVJ heton për shkaqet e mospërputhjes dhe merr vendim për moshapjen e kësaj kutie. Kundër këtij vendimi të GNVJ bëhet ankim sipas procedurave të përcaktuara në nenin 124 të Kodit Zgjedhor.

Pasi hap **Kutinë e Posaçme të Votimit nga Jashtë** sekretari i GNVJ në prani të anëtarëve të tjerë, si dhe të vëzhguesve nxjerr nga kjo kuti dokumentacionin zgjedhor që përmban kjo kuti.

Nëse gjatë shqyrtimit të këtij dokumentacioni gjenden Zarfa të Jashtëm të cilët përmbajnë Kodin Unik të Zgjedhësit GNVJ e vlerëson këtë dokumentacion sipas parashikimeve të Kreut III.4 të këtij akti duke bërë korrigjimet përkatëse në Tabelën e Rezultatit të Votimit nga Jashtë të Zonës Zgjedhore nëse është rasti. Në këtë rast vula në zarfin e postës duhet të datojë jo më vonë se ora 19:00 e ditës së votimit.

Në përfundim të procesit të shqyrtimit të dokumentacionit zgjedhor GNVJ i rifut atë në ***Kutinë e Posaçme të Votimit nga Jashtë***. Kutia mbyllet me vula sigurie me kod. Të dhënat e kodeve të vulave të sigurisë shënohen në Procesverbalin të Votimit nga Jashtë të Zonës Zgjedhore.

Në lidhje me procedurën për numërimin dhe vlerësimin e dokumentacionit zgjedhor gjendur në Kutinë Rezervë të Votimit nga Jashtë, në projektakt parashikohet se Sekretari i GNVJ vendos mbi tavolinën e numërimit ***Kutinë Rezervë e Votimit nga Jashtë*** dhe lexon kodet e vulave të sigurisë me të cilat është mbyllur kjo kuti. Verifikohet nëse kodet e vulave të sigurisë janë të njëjta me ato të mbylljes së kutisë dhe i shënon ato në Procesverbalin e Votimit nga Jashtë të Zonës zgjedhore përkatëse. Nëse ka mospërputhje, atëherë GNVJ heton për shkaqet e mospërputhjes dhe merr vendim për moshapjen e kësaj kutie. Kundër këtij vendimi të GNVJ bëhet ankim sipas procedurave të përcaktuara në neni 124 të Kodit Zgjedhor.

Pasi hap ***Kutinë Rezervë të Votimit nga Jashtë*** sekretari i GNVJ në prani të anëtarëve të tjerë, si dhe të vëzhguesve nxjerr nga kjo kuti dokumentacionin zgjedhor që përmban kjo kuti.

Nëse gjatë shqyrtimit të këtij dokumentacioni GNVJ konstaton se vula në zarfin e operatorit të shërbimit postar datoj jo më vonë se ora 19:00 e datës së zgjedhjeve e vlerëson këtë dokumentacion sipas parashikimeve të Kreut III.4 të këtij akti duke bërë korrigjimet përkatëse në Tabelën e Rezultatit të Votimit nga Jashtë të Zonës Zgjedhore nëse është rasti.

Në përfundim të procesit të shqyrtimit të dokumentacionit zgjedhor GNVJ i rifut atë në ***Kutinë e Rezervë të Votimit nga Jashtë***. Kutia mbyllet me vula sigurie me kod. Të dhënat e kodeve të vulave të sigurisë shënohen në Procesverbalin të Votimit nga Jashtë të Zonës Zgjedhore.

Në lidhje me procedurën për numërimin dhe vlerësimin e dokumentacionit zgjedhur gjendur në Kutinë e Posaçme Rezervë të Votimit nga Jashtëm, në projektakt parashikohet se Sekretari i GNVJ vendos mbi tavolinën e numërimit ***Kutinë e Posaçme Rezervë të Votimit nga Jashtë*** dhe lexon kodet e vulave të sigurisë me të cilat është mbyllur kjo kuti. Verifikohet nëse kodet e vulave të sigurisë janë të njëjta me ato të mbylljes së kutisë dhe i shënon ato në Procesverbalin e Votimit nga Jashtë të Zonës zgjedhore përkatëse. Nëse ka mospërputhje, atëherë GNVJ heton për shkaqet e mospërputhjes dhe merr vendim për moshapjen e kësaj kutie. Kundër këtij vendimi të GNVJ bëhet ankim sipas procedurave të përcaktuara në nenin 124 të Kodit Zgjedhor.

Pasi hap ***Kutinë e Posaçme Rezervë të Votimit nga Jashtë*** sekretari i GNVJ në prani të anëtarëve të tjerë, si dhe të vëzhguesve nxjerr nga kjo kuti dokumentacionin zgjedhor që përmban kjo kuti.

Nëse gjatë shqyrtimit të këtij dokumentacioni gjenden Zarfa të Jashtëm të cilët përmbajnë Kodin Unik të Zgjedhësit GNVJ e vlerëson këtë dokumentacion sipas parashikimeve të Kreut III.4 të këtij akti duke bërë korrigjimet përkatëse në Tabelën e Rezultatit të Votimit nga Jashtë të Zonës Zgjedhore nëse është rasti. Në këtë rast vula në zarfin e postës duhet të datojë jo më vonë se ora 19:00 e ditës së votimit.

Në përfundim të procesit të shqyrtimit të dokumentacionit zgjedhor GNVJ i rifut atë në ***Kutinë e Posaçme Rezervë të Votimit nga Jashtë***. Kutia mbyllet me vula sigurie me kod. Të dhënat e kodeve të vulave të sigurisë shënohen në Procesverbalin të Votimit nga Jashtë të Zonës Zgjedhore.

Në Kreun V të këtij projektvendimi parashikohen rregullat në lidhje me llojet e vlerësimit të votave dhe tabulimit të rezultatit zgjedhor.

Sa i përket llojet e vlerësimit të votave, në zbatim të nenit 117 të Kodit Zgjedhor përcaktohen llojet e votave, si dhe kriteret për vlerësimin e tyre. Referuar përcaktimit të këtij neni, fletët e votimit ndahen në vota të vlefshme ose në vota të pavlefshme. *Vota të vlefshme* janë vetëm fletët e votimit, në të cilat është votuar qartësisht vetëm për njërin nga subjektet zgjedhore dhe/ose vetëm për njërin nga kandidatët e tij. Kur është votuar për më shumë se një kandidat të të njëjtit subjekt zgjedhor, vota i llogaritet vetëm subjektit zgjedhor.

Krahas sa parashikohet tjetër në këtë akt vota të pavlefshme janë fletët e votimit kur:

- a) fleta e votimit nuk ka të njëjtën madhësi, ngjyrë ose formë me fletën e votimit të miratuar nga KQZ-ja;
- b) në fletën e votimit janë bërë shënime apo shenja që bëjnë të pamundur vlerësimin e votës;
- c) në fletën e votimit janë bërë shënime në favor ose në disfavor të subjekteve të caktuara zgjedhore;
- d) është votuar për më shumë se një nga subjektet zgjedhore në fletën e votimit;
- e) nuk është votuar për asnjë nga subjektet zgjedhore në fletën e votimit;
- f) është votuar për një subjekt zgjedhor dhe për kandidatin e një subjekti tjetër zgjedhor;
- g) nuk është e qartë se për kë është votuar;
- h) zgjedhësi ka votuar për një person apo subjekt që nuk është në fletën e votimit.

Në lidhje me tabulimin e rezultatit të votave nga jashtë, në projektakt parashikohet se numri i votave të vlefshme për çdo subjekt zgjedhor, si dhe të dhëna të tjera të pasqyruara në Tabelën e Rezultatit të Votimit nga Jashtë përfshihen nga KQZ në Tabelën Përmbledhëse të Rezultatit të Zonës Zgjedhore përkatëse.

Në Kreun VI të këtij projektvendim përcaktohen rregulla lidhur me monitorimin dhe vëzhgimin e proceseve të rregulluara nga ky vendim, ku përcaktohet e drejta e çdo subjekti për të caktuar një vëzhgues për çdo taavolinë numëimi. Këtë të drejtë e ka edhe çdo organizatë vendase apo e huaj, e cila ka marrë akreditimin për vëzhgimin e zgjedhjeve nga KQZ.

Vëzhguesit kanë të drejtë të marrin kopje të Tabelës së Rezultatit të Votimit nga Jashtë të Zonës Zgjedhore.

Për sa më lart, në këtë relacion, Komisioneri Shtetëror i Zgjedhjeve, brenda kompetencave të veta, dhe në respektim të detyrimeve e afateve ligjore të përcaktuara në ligjin nr.10019, datë 29.12.2008, “Kodi Zgjedhor i Republikës së Shqipërisë”, i ndryshuar, i propozon për shqyrtim dhe miratim Komisionit Rregullator projektvendimin, “*Mbi rregullat për numërimin dhe vlerësimin e votave nga jashtë, dokumentacionin përkatës dhe mënyrën e plotësimit të tij, si dhe tabulimin e rezultatit të votimit nga jashtë*”.

Në datën **12 Nëntor**, projektvendimi “*Mbi rregullat për numërimin dhe vlerësimin e votave nga jashtë, dokumentacionin përkatës dhe mënyrën e plotësimit të tij, si dhe tabulimin e rezultatit të votimit nga jashtë*”.

- ju është dërguar për konsultim publik nëpërmjet email-it:
  - Komisionit Rregullator;
  - Përfaqësuesve të partive politike;

- Përfaqësuesve të organizatave të diasporës, organizatave të shoqërisë civile vendase të angazhuara në mirëqeverisjen dhe demokratizimin, veprimtaria e të cilave ka në fokus zgjedhjet;

duke i lënë në dispozicion një afat për dërgimin e komenteve/ sugjerimeve nga ana e tyre deri në datën **15 Nëntor, ora 16:00**.

- KSHZ ka zhvilluar me përfaqësues të organizatave të diasporës, organizatave të shoqërisë civile vendase të angazhuara në mirëqeverisjen dhe demokratizimin, veprimtaria e të cilave ka në fokus zgjedhjet një takim konsultativ online **në datën 14 Nëntor, ora 17.00-18.30** (me orën e Tiranës) ku u morën dhe u reflektuan një sërë mendimesh si shpjeguar në sesionin më poshtë.

### **Bashkëndimi i projektvendimit me palët e interesuara**

Kanë shprehur mendimet e tyre me shkrim në lidhje me këtë projektvendim KRIIK dhe Shqipëria Bëhet:

**-KRIIK**, me shkresën nr. 241/21 Prot., datë 15.11.2024 duke shprehur disa rekomandime lidhur me projektvendimin “Mbi rregullat për numërimin dhe vlerësimin e votave nga jashtë dhe përfshirjen e tyre në rezultatin e zgjedhjeve”. KRIIK sjell në vëmendje **Mungesën e qartësisë mbi autoritetin vendimmarrës në të gjithë procesin e numërimit të votave nga jashtë apo, akoma më problematike, veshja e GNVJ-ve me kompetenca vendimmarrëse. Sipas KRIIK, GNVJ nuk mund të ketë legjitimitetin e duhur lidhur me të tilla vendimmarrje që mund të afektojnë rezultatin zgjedhor.** Në gjykimin e KRIIK, duhet të jetë vetëm një trupë që kryen detyra kleralike, të ngjashme me ato të GNV-ve dhe të kenë të njëjtat kompetenca. Sipas vlerësimit të KQZ-së, ky rekomandim nuk qëndron, pasi vendimmarrja me shumicë e GNVJ-ve ka qenë në fakt qëllimi jonë përsa kohë kemi parashikuar numër tek në përbërje.

Në lidhje me anëtarësinë e GNVJ-ve, KRIIK rekomandon që formulimi i projektaktit t’i qëndrojë besnik gjuhës së përdorur nga Kodi Zgjedhor në të gjitha pikat, duke bërë të qartë se është administrata e KQZ-së që do të kryejë numërimin dhe vlerësimin e votave nga jashtë. Duhet të përcaktohet qartë se administratë e KQZ-së, në funksion të këtij procesi, do të konsiderohet trupa e përkohshme e administratës së institucionit, apo dhe mund të përfshihen si pjesë e kësaj administrate, në rast se do të jetë e nevojshme, punonjës të përhershëm të KQZ-së.

Gjithashtu KRIIK **rekomandon se edhe kutitë e votimit nga jashtë do të duhet t’i nënshtrohen Procesit të Auditimit Pas zgjedhor**, në lidhje me këtë KQZ duhet të parashikojë amendimet e nevojshmenë aktet nënligjore përkatëse së bashku me masat administrative që do të ndërmerren në rast shkeljeje. **Informacioni mbi procesin e auditimit post-zgjedhor dhe pasojat e dala prej tij, të bëhen pjesë e sesioneve informuese gjatë trajnimeve si dhe e kontratave që do të lidhen. Lidhur me këtë rekomandim të KRIIK, KQZ sqaron se administrata e KQZ-së dhe personeli shtesë për këtë proces, në kuptimin e marrëdhënieve të punës dhe angazhimit në KQZ janë e njëjta gjë. Personi i kontraktuar me kontrata disamujore në KQZ janë staf me kohë të plotë të cilët deklarohen në KQZ në organet tatimore e për të cilët paguhen kontribute për periudhën e caktuar të punësimit. Ata nënshkruajnë kontrata pune me detyra e përgjegjësi të qarta për çdo proces (ashtu sikundër në këtë rast për votimin nga jashtë). Përgjegjësia nga ana tjetër për anëtarët e GNVJ ashtu sikundër edhe për ata brenda vendit është adminsitrativë dhe penale në bazë të legjislacionit në fuqi.**

Në lidhje me transportin e materialeve zgjedhore dhe fletëve të votimit nga jashtë nga KQZ-ja në VNVJ, sipas të cilit QZ do të kontraktojë një ambient jashtë godine ku ushtron aktivitetin e vet, ky parashikim duhet të saktësojë tërë detajet e nevojshme qoftë për transportin nga KQZ- ja drejt sallës ku do të kryhet numërimi apo nga kompania postare direkt në këtë



ambient që në fillim të procesit, si edhe dërgimin e tyre më pas në ambientet ku materialet do të ruhen në vijim.

Thënë sa më sipër, KQZ-ja nevojitet gjithashtu të ketë në konsideratë faktin që procesi i votimit nga jashtë në tërësinë e tij duhet të përmbajë së paku të njëjtat hallka sikurse ai brenda vendit si dhe përmbajtjen e akteve të miratuara tanimë nga KQZ-ja.

**Në vlerësimin e KQZ-së lidhur me këtë projektvendim, sipas shpjegimeve të dhëna në takimin online, administrimi i dokumentacionit zgjedhor deri ditën e zgjedhjeve dhe gjatë numërimit do të bëhet logjikshëm jashtë godinës kryesore të KQZ pasi ajo nuk disponon hapësirat e nevojshme për këtë qëllim duke qenë se ndërkohë në këtë godinë zhvillohen edhe aktivitetet e tjera të KQZ në funksion të zgjedhjeve brenda vendit.**

**Kushtet dhe kriteret për këtë vendndodhje janë ato të parashikuara nga Kodi si për të gjithë VNVJ-të e tjera, konkretisht:**

### **III.1 Vendi i numërimit të votave**

- 1. Vendi i numërimit të votave nga jashtë, nga këtu e vijim në këtë akt referuar si VNVJ caktohet me vendim të KQZ, jo më vonë se 40 ditë përpara datës së zgjedhjeve.**
- 2. Jo më vonë se 60 ditë përpara datës së zgjedhjeve Prefekti i Qarkut Tiranë vendos në dispozicion të KQZ, listën e objekteve sipas kërkesave të pikës 1 dhe 2 të nenit 93, si dhe të nenit 94 të Kodit Zgjedhor.**
- 3. KQZ organizon VNVJ në përputhje me parashikimet e nenit 94 të Kodit Zgjedhor. Ndërkohë kushtet dhe garancitë që duhet të ketë vendi ku ruhen dhe administrohen votat deri në fillim të numërimit parashikohet në Vendimin 13/2024 të KRR, seksioni III.4 pika 2, si vijon:**

**Operatori i shërbimit postar ka detyrimin që pritja, grumbullimi dhe ruajtja e dokumentacionit zgjedhor nga momenti i mbërritjes në Republikën e Shqipërisë deri në dërgimin e këtij dokumentacioni në KQZ duhet të bëhet në një ambient të posaçëm i cili duhet të ketë shërbim të monitorimit me kamera. Regjistrimet e këtij monitorimi ruhen në përputhje me parashikimet ligjore përkatëse, por në cdo rast deri në shpalljen e rezultatit përfundimtar të zgjedhjeve. Me kërkesë, subjekteve zgjedhore u vihet në dispozicion një kopje e regjistrimeve të këtij monitorimi.**

Në lidhje me “anëtarët vëzhgues” të GNVJ-ve, KRIIK rekomandon se është e nevojshme që në akt të përcaktohet procedura e propozimit, emërimit, si dhe e shkarkimit të tyre. Në vlerësimin e KQZ-së, parashikimi i bërë në pikën 7 të seksionit III.2 për numrin e vëzhguesve në tryezën e numërimit është bërë për të krijuar lehtësi logjistike dhe për të mos krijuar konfuzion në tavolinën e numërimit. Aktualisht sipas këtij projektvendimi në çdo tavolinë do të jenë: 3 anëtarët e GNVJ dhe 2 vëzhgues. Sa më shumë rritet ky numër, aq më e vështirë dhe konfuzë mund të bëhet puna për numëruesit të cilët duhet të kenë qetësinë dhe mundësinë të kryejnë detyrën. Deri më tani, nuk ka pasur koment apo propozim/pretehim të tillë nga partitë të cilat e kanë këtë projektvendim për konsultim.

**Në lidhje me të drejtën e kontestimit të vlerësimit të fletëve të votimit, KRIIK konstaton se është e paqartë nëse anëtarët vëzhgues mund të kontestojnë ose jo vlerësimin e fletëve të votimit, njësoj si anëtarët e tjerë të GNVJ-së. Duke qenë se kjo kategori vëzhguesish anëtarë nuk është e përcaktuar në Kodin Zgjedhor, kjo e drejtë, apo mungesa e saj, nuk mund të eduktohen as nga as nga kuadri ligjor parësor, pra është e nevojshme që të përcaktohet qartë në këtë akt e drejta ose jo e anëtarëve vëzhgues për të kontestuar vlerësimin e fletëve të votimit.**

Duke qenë se një e drejtë e njohur nga Kodi Zgjedhor nuk mund të anashkalohej me një akt të

KQZ-së, logjikshëm e drejta për të kontestuar një fletë votimi do të duhet t'u njihet edhe vëzhguesve të subjekteve zgjedhore.

Në mënyrë që të evitohen ngërçe apo interpretime gjatë numërimit, **KRIIK gjykon se duhet të përcaktohet qartë në akt dhënia e së drejtës vëzhguesve të subjekteve zgjedhore për të kontestuar vlerësimin e një flete votimi, si dhe parashikimi i procedurave në vijim.**

Gjithashtu, duke patur në konsideratë se në rastet e votave të kontestuara në procesin e numërimit brenda vendit është KZAZ-ja që vendos nëse janë të vlefshme apo të pavlefshme, në këtë rast është e nevojshme të përcaktohet se trupa që duhet të vendosë nëse vota e kontestuar nga anëtarët apo vëzhguesit është e vlefshme ose jo, të jetë trupa nga administrata që mbikëqyr dhe drejton punën e GNVJ-ve. **Në vlerësimin e KQZ-së është e ezauruar me faktin që në Kod edhe vëzhguesit në VNV kontestojnë e në këtë rast subjektet kanë vëzhgues në VNVJ, gjithsesi nuk na kushton për ta reflektuar -Komenti u pranua dhe u reflektua në projektvendim në piken III.4.9.**

*Në lidhje me lidhje me modalitetin e njoftimit për nisjen e numërimit të votave brenda vendit, KRIIK rekomandon se projektakti duhet të përcaktojë në mënyrë shteruese metodat që mund të përdoren për përcjelljen e njoftimit, si dhe personin përgjegjës për marrjen dhe përcjelljen e këtij njoftimi tek GNVJ-ja përkatëse. Dhe nëse do të gjykohet e arsyeshme të vendoset një trupë vendimmarrëse dhe menaxhuese e këtij procesi (KZAZJ-ja), atëherë njoftimi mund të kryhet direkt aty duke përcaktuar kontaktin e kryetarit apo sekretarit të kësaj trupe. Nëse propozimi i bërë nuk do të merret në konsideratë, atëherë duhet të parashikohet në akt pozicioni në administratën e KQZ-së i personit që do të jetë përgjegjës për këtë proces, ose mënyrën e përcaktimit të tij, p.sh me urdhër të Komisionerit. -Komenti u pranua dhe u reflektua në projektvendim në seksionin III.3 pika 1 sikundër vijon: “Sekretari i KZAZ ka detyrimin të njoftojë menjëherë KQZ në momentin kur fillon numërimi i kutisë së parë të votimit brenda vendit. Njoftimi bëhet nëpërmjet postës elektronike, ose nëpërmjet mesazhit në aplikacionin KQZ, apo aplikacione të tjera.”*

-Detyra konkrete e cila do t'i ngarkohet njërit prej anëtarëve ose sekretarit të KZAZ-së specifikohet në detyrat/përgjegjësitë dhe manualët e punës së tyre dhe nuk gjen vend në një akt normues.

***Shqipëria Bëhet** në datën 25. 11. 2024 ka parashtruar rekomandimet e saj mbi vëzhguesit në Numërimin e Vlerësimin të Votës nga Jashtë dhe shprehet se në projekakt parashikohet shprehimisht e drejta e çdo subjekti zgjedhor për të pasur një vëzhgues për çdo tavolinë numërimi. Përsa më lart, propozojnë rishikimin/ saktësimin në mënyrë që të mos i mohohet e drejta e vëzhguesve partive jo parlamentare ose atyre me numër të vogël përfaqësuesish në Parlament.*

**Jona JOSIFI - Drejtorja e Votimit nga Jashtë**

**Pavlina DOÇAJ – Drejtorja e Ligjshmërisë**

**Majlinda ÇELMETA – Sekretar i Përgjithshëm (në mungesë dhe me urdhër)**

**Komisioneri Shtetëror i Zgjedhjeve**

**Ilirjan CELIBASHI**



**REPUBLIKA E SHQIPËRISË  
KOMISIONI QENDROR I ZGJEDHJEVE  
KOMISIONI RREGULLATOR**

Data: DD MM VVVV

Nr:000-000

Ora: HH:MM

**PROJEKTVENDIM**

**MBI**

**RREGULLAT PËR NUMËRIMIN DHE VLERËSIMIN E VOTAVE NGA JASHTË,  
DOKUMENTACIONIN PËRKATËS, SI DHE TABELIMIN E REZULTATIT TË  
VOTIMIT NGA JASHTË**

Në mbështetje të nenit 20, pika 1, shkronja “dh”, nenit 25/1 të ligjit Nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar, me propozimin e Komisionerit Shtetëror të Zgjedhjeve, Komisioni Rregullator

**V E N D O S I:**

**KREU I**

**PARIMET**

1. Procesi i numërimit dhe vlerësimit të votave të votuesve nga jashtë territorit të Republikës së Shqipërisë respekton parimet e ligjshmërisë, paanërisë, transparencës dhe sigurisë për votën.
2. Parimi i diskrecionit: Komisioni Qendror i Zgjedhjeve ka të drejtën të veprojë me diskrecion brenda limiteve të përcaktuara nga Kushtetuta dhe Kodi Zgjedhor, me qëllim sigurimin dhe mbrojtjen e votës së shtetasve shqiptarë jashtë vendit. Diskrecioni ushtrohet në mënyrë që të përmirësohen proceset dhe të adresohen situata të paparashikuara për të garantuar realizimin e votës.

**KREU II**

**RREGULLA TË PËRGJITHSHME**

Data: dd mmvvvv Nr: 000-000  
Ora: hh:mm



Mbi rregullat për numërimit dhe vlerësimit e votave nga jashtë, dokumentacionin përkatës, si dhe tabelimin e rezultatit.

1. Komisioni Qendror i Zgjedhjeve administron dhe numëron çdo fletë votimi që ka hyrë në territorin e Republikës së Shqipërisë deri në orën e mbylljes së votimit brenda vendit sipas përcaktimeve të Kodit Zgjedhor.
2. Çdo fletë votimi që ka hyrë në territorin e Republikës së Shqipërisë pas orarit të mbylljes së votimit brenda vendit pranohet nga KQZ dhe administrohet sipas rregullave të përcaktuara në këtë vendim. Orari i hyrjes në Republikën e Shqipërisë verifikohet nëpërmjet vulës së hyrjes në zarfin e operatorit të shërbimit postar.
3. Fletët e votimit të dërguara nga zgjedhësit jashtë territorit të Republikës së Shqipërisë numërohen dhe vlerësohen në një ambient të caktuar nga Komisioni Qendror i Zgjedhjeve.
4. Procesi i numërimit dhe i vlerësimit të votave nga jashtë, si dhe i tabulimit të rezultatit zgjedhor përkatës kryehet nga administrata e KQZ-së.
5. Numërimi, vlerësimi i votave nga jashtë, si dhe tabulimi i rezultatit kryehet veçmas për çdo zonë zgjedhore.
6. Procesi i numërimit fillon në të njëjtin moment që fillon numërimi i kutisë së parë me fletë votimi të zonës zgjedhore përkatëse, në votimin brenda vendit.
7. Subjektet zgjedhore, organizatat e shoqërisë civile dhe media kanë të drejtë të monitorojnë dhe vëzhgojnë procesin e numërimit dhe të vlerësimit të votës nga jashtë në përputhje me dispozitat përkatëse të Kodit Zgjedhor, këtë vendim si dhe me aktet e tjera nënligjore të Komisionit Qendror të Zgjedhjeve.

### **KREU III**

#### **PËRGATITJA PËR NUMËRIMIN DHE VLERËSIMIN E VOTAVE**

##### **III.1. Vendi i numërimit të votave**

1. Vendi i numërimit të votave nga jashtë, nga këtu e vijim në këtë akt referuar si VNVJ caktohet me vendim të KQZ, jo më vonë se 40 ditë përpara datës së zgjedhjeve.
2. Jo më vonë se 60 ditë përpara datës së zgjedhjeve Prefekti i Qarkut Tiranë vendos në dispozicion të KQZ, listën e objekteve sipas kërkesave të pikës 1 dhe 2 të nenit 93, si dhe të nenit 94 të Kodit Zgjedhor.
3. KQZ organizon VNVJ në përputhje me parashikimet e nenit 94 të Kodit Zgjedhor.
4. Në VNVJ lejohet të jenë të pranishëm vetëm:
  - a) Personeli/stafi i i KQZ;
  - b) Përfaqësuesit e akredituar të medias;
  - c) Vëzhguesit e subjekteve zgjedhore;
  - d) Vëzhguesit e tjerë të akredituar;
  - e) Kandidatët;

5. Të gjithë personat e pranishëm në VNV, duhet të jenë të pajisur me dokument identifikimi për të verifikuar identitetin e tyre.
6. Në VNVJ instalohen sisteme të monitorimit me kamera të ambientit të VNVJ, si dhe procesit të numërimit dhe të vlerësimit të votave, të njëjta me ato që vendosen në VNV në votimin brenda vendit.

### III.2. Personeli përgjegjës për numërimin dhe vlerësimin e votave

1. Numërimi dhe vlerësimi i votave nga jashtë kryhet nga Komisioni i Numerimit dhe Vlerësimit të Votës nga Jashtë, nga këtu e vijim në këtë referuar si KNVJ, si dhe Grupe të Numërimit, të Votave nga Jashtë, nga këtu e vijim në këtë akt referuar si GNVJ.
2. KNVVJ përbëhet nga tre anëtarë të caktuar nga KQZ, jo më vonë se 20 ditë përpara datës së zgjedhjeve.
3. Anëtarët e KNVJ duhet të plotësojnë kushtet dhe kriteret sikurse ato të emërimit të anëtarit të Komisionit Zonal të Administrimit Zgjedhor (KZAZ), përjashto kushtin e vendbanimit në zonën zgjedhore përkatëse. Anëtari KNVVJ shkarkohet për të njëjtat shkaqe që shkarkohet anëtari i KZAZ.
4. GNVJ përbëhet nga dy anëtarë të caktuar nga KQZ. Një nga anëtarët e GNVJ caktohet me deyrën e sekretarit. Vendimi për caktimin e anëtarëve të GNVJ merret jo më vonë se 10 ditë përpara datës së zgjedhjeve.
5. Anëtarët e GNVJ duhet të plotësojnë kushtet dhe kriteret sikurse ato të emërimit të anëtarit të Grupit të Numërimit të Votave për votimin brenda vendit, përjashto kushtin e vendbanimit në zonën zgjedhore përkatëse. Anëtari GNVJ shkarkohet për të njëjtat shkaqe që shkarkohet edhe anëtari i GNV.
6. GNVJ caktohet veçmas për çdo zonë zgjedhore. Në zona zgjedhore ku numri i votuesve nga jashtë është më i madh se 5000, caktohen jo më pak se dy grupe numërimi, të cilat i kryejnë detyrat sipas këtij akti, njëri pas tjetrit, jo në të njëjtën kohë. Radha caktohet nga KQZ.
7. Partia më e madhe e shumicës parlamentare dhe partia më e madhe e opozitës parlamentare kanë të drejtë të caktojnë nga një vëzhgues pranë tavolinës së çdo GNVJ. Këta vëzhgues kanë të drejtë vetëm të monitorojnë dhe vëzhgojnë procesin e numërimit dhe të vlerësimit të votave, si dhe të shënojnë komentet e tyre në *Procesverbalin e GNVJ për vlerësimin e dokumentacionit në Kutinë e Votimit nga Jashtë* përkatëse.
8. Anëtarët e GNVJ të caktuar në turnin e parë duhet të paraqiten në VNVJ, në tavolinën përkatëse të numërimit, jo më vonë se ora 21:00 e ditës së votimit.
9. Përfaqësuesit e partive parlamentare në KQZ kanë të drejtë të përjashtojnë nga qenia anëtarë i KNVVJ, ose i GNVJ çdo person të caktuar në atë detyrë në rast se kanë dyshime për profesionalizmin dhe paanësinë e tij. Këtë të drejtë ato e ushtrojnë vetëm një herë.

### III.3. Dërgimi i dokumentacionit zgjedhor të votimit nga jashtë në ambientet e VNVJ

1. Dokumentacioni zgjedhor i votimit nga jashtë i administruar sipas përcaktimeve të vendimit të Rregullatorit nr. 13 datë 12.11.2024 “Për miratimin e rregullave për procedurën e votimit nga jashtë” dërgohet/transportohen në ambientet e VNVJ jo më vonë se ora 21.00 e ditës së votimit.
2. Për dorëzimin në VNVJ të Kutive të Votimit nga Jashtë, Kutive të Posaçme të Votimit nga Jashtë, Kutive Rezervë të Votimit nga Jashtë dhe Kutive të Posaçme Rezervë të Votimit nga Jashtë, nga këti e vijim në akt referuar të gjitha si Kutitë, mbahet një *Procesverbal i Dorëzimit të Kutive të Dokumentacionit Zgjedhor nga Jashtë* midis të paktën një anëtari të KNVVJ dhe personelit të KQZ që është ngarkuar me dorëzimin e kutive përkatëse. Kopje të këtij procesverbali marrin KNVVJ, KQZ, si dhe vëzhguesit e partive parlamentare.
3. Përpara dorëzimit të Kutive nga KQZ tek KNVVJ, KQZ duhet të bëjë indeksimin e cdo kutie me numra natyror të njëpasnjëshëm duke filluar nga numri një vecmas për cdo lloj/kategori kutie.. Indeksi fillon në radhë sipas qarqeve sikurse janë numertuar qendrat e votimit të votimit brenda vendit. *Numri i indeksit vendoset në një rën prej faqeve anësore të çdo Kutie.*
4. Nëse gjatë marrjes në dorëzim të kutive rezulton se kodet e vulave të sigurisë nuk përputhen me ato të shënuara gjatë mbylljes së tyre, atëherë kutia përkatëse vlerësohet si “Kuti e Parregullt” dhe mbi të *vendoset shënimi “Kuti e Parregullt”*.
5. Kutia e Parregullt nuk i jepet GNVJ për numërim, apo vlerësim të votave, por i nënshtrohet një hetimi administrativ sipas përcaktimeve të neneit 136 dhe 138 të Kodit Zgjedhor.
6. Transportimi i Kutive nga ambienti ku ato ruhen dhe administrohen sipas vendimit të Rregullatorit nr. 13 datë 12.11.2024 “Për miratimin e rregullave për procedurën e votimit nga jashtë” për tek VNVJ bëhet i shoqëruar nga Policia e Shtetit.

## KREU IV

### NUMËRIMI DHE VLERËSIMI I VOTAVE

#### IV.1. Procedura për fillimin e numërimit dhe vlerësimin e votës nga jashtë vendit

1. Sekretari i KZAZ ka detyrimin të njoftoj menjëherë KQZ në momentin kur fillon numërimi i kutisë së parë të votimit brenda vendit. Njoftimi bëhet nëpërmjet platformave elektronike të komunikimit në adresat e përcaktuara nga KQZ.
2. Kur KQZ, në bazë të njoftimit të marrë nga KZAZ, apo KZAZ-të e zonës zgjedhore përkatëse konstaton se ka filluar numërimi i kutisë së parë të votimit brenda vendit për atë zonë zgjedhore, fillon menjëherë numërimin dhe vlerësimin e votave nga jashtë për atë zonë.
3. Procesi i numërit dhe vlerësimit të dokumentacionit zgjedhor të administruar në llojet përkatëse të kutive fillon nga kutia e indeksuar me numrin 1.

#### **IV.2. Procedura për numërimin dhe vlerësimin e dokumentacionit zgjedhor të administruar në Kutinë e Votimit nga Jashtë.**

1. Sekretari i GNVJ vendos mbi tavolinën e numërimit Kutinë e Votimit nga Jashtë dhe lexon kodet e vulave të sigurisë me të cilat është mbyllur kjo kuti. Verifikohet nëse kodet e vulave të sigurisë janë të njëjta me ato të procesverbalit të mbylljes së kutive dhe i shënon ato në *Procesverbalin e GNVJ për Vlerësimin e Dokumentacionit në Kutinë e Votimit nga Jashtë*. Nëse ka mospërputhje, atëherë GNVJ njofton menjëherë KNVVJ e cila merr vendim për përfshirjen ose jo në numërim të asaj kutie. Kundër këtij vendimi mund të bëhet ankim sipas procedurave të përcaktuara në nenin 124 të Kodit Zgjedhor.
2. Pasi hap Kutinë e Votimit nga Jashtë sekretari i GNVJ në prani të anëtarit tjetër si dhe të vëzhguesve nxjerr nga kjo kuti Zarfat e Jashtëm të cilët kanë të shënuar Kodin Unik dhe i numëron ata. Numri i tyre shënohet në *Procesverbalin e GNVJ për Vlerësimin e Dokumentacionit në Kutinë e Votimit nga Jashtë*.
3. GNVJ nxjerrë nga secili prej Zarfeve të Jashtëm, zarfin që përmban fletën e votimit dhe shënon në *Procesverbalin e GNVJ për vlerësimin e dokumentacionit në Kutinë e Votimit nga Jashtë* numrin e zarfeve me fletë votimi të gjendura brenda Zarfeve të Jashtëm.
4. Nëse pas hapjes së Zarfës të Jashtëm konstatohet se mungon zarfi ku futet fleta e votimit, apo fleta e votimit gjendet jashtë këtij zarfi, apo në Zarfën e Jashtëm mungon Kodi Unik, atëherë GNVJ e shënon gjetjen në *Procesverbalin e GNVJ për Vlerësimin e Dokumentacionit në Kutinë e Votimit nga Jashtë*. Në këtë rast vota është e pavlefshme. Dokumentacioni zgjedhor i këtij i rasti administrohet në një zarf të veçantë.
5. Përjashtoj rastet e parashikuara në pikën 5 të këtij kreu, Zarfet brenda të cilëve janë fletët e votimit, pasi janë nxjerrë nga Zarfet e Jashtëm, përpara se të numërohen dhe të vlerësohen, vendosen në një kuti plastike transparente dhe më pas përzihen po brenda kësaj kutie. Kutia pozicionohet në mënyrë të tillë që të mund të shikohet nga vëzhguesit.
6. Procesi i numërit dhe vlerësimit të votave kryhet fillimisht për subjektet zgjedhore, parti politike ose koalicionin i partive dhe më pas për kadidaët e preferuar.
7. Sekretari i GNVJ nxjerr me radhë nga secili zarf që mban fletën e votimit këtë të fundit dhe lexon me zë emrin e subjektit zgjedhor/parti politike/koalicion për të cilin është bërë shënimi përkatës në këtë fletë votimit. Njëkohësisht fleta e votimit shfaqet në një monitor për tu parë nga personat e tjerë të pranishëm në VNVJ. Vlerësimi i fletës së votimit bëhet sipas parashikimeve të Kreut V.1 të këtij akti.
8. Nëse në zarfin e fletës së votimit mungon fleta e votimit, atëherë rasti shënohet në *Procesverbalin e GNVJ për vlerësimin e dokumentacionit në Kutinë e Votimit nga Jashtë*.



9. Nëse ndonjë prej anëtarëve të GNVJ ka kontestime në lidhje me vlerësimin e fletës së votimit, ky kontestim shënohet në *Procesverbalin e GNVJ për Vlerësimin e Dokumentacionit në Kutinë e Votimit nga Jashtë*. Në pjesën mbrapa të fletës së votimit, nga faqja që nuk janë emrat e subjekteve zgjedhorë, sekretari shënon fjalën “E kontestuar”.

10. Pasi përfundon numërimi dhe vlerësimi i fletëve të votimit sipas pikës 7 të këtij Kreu, Sekretari i GNVJ plotëson *Procesverbalin e GNVJ për vlerësimin e dokumentacionit në Kutinë e Votimit nga Jashtë* duke shënuar numrin e votave të vlefshme, numrin e votave të pavlefshme, numrin e votave për çdo subjekt zgjedhor, si dhe numrin e votave të kontestuara.

11. Fletët e votimit të numëruara dhe të vlerësuara nënshkruhen nga anëtarët e GNVJ në faqen që nuk janë emrat e subjekteve zgjedhorë. (*Variant: Ju vendoset një vulë*)

12. Pasi GNVJ ka shënuar në *Procesverbalin e GNVJ për vlerësimin e dokumentacionit në Kutinë e Votimit nga Jashtë* rezultatin e votimit për subjektet zgjedhore, parti politike dhe koalicionet partive, fillon numërimin e dhe vlerësimin e votave preferenciale për kandidatët për deputet. Numri i votave për çdo kandidat shënohet gjithashtu në *Procesverbalin e GNVJ për vlerësimin e dokumentacionit në Kutinë e Votimit nga Jashtë*.

13. Fletët e votimit për çdo subjekt zgjedhor, apo kandidatë për deputet që ka marrë votë preferenciale vendosen në zarfa të veçantë.

14. Në përfundim të procesit të vlerësimit dhe të numërimit të fletëve të votimit sipas këtij kreu, GNVJ i fut ato në Kutinë e Votimit nga Jashtë. Në këtë kuti vendosen edhe Zarfat e Jashtëm. Kutia mbyllet me vula sigurie me kod. Të dhënat e kodeve të vulave të sigurisë shënohen në *Procesverbalin e GNVJ për Vlerësimin e Dokumentacionit në Kutinë e Votimit nga Jashtë*.

15. *Procesverbali i GNVJ për Vlerësimin e Dokumentacionit në Kutinë e Votimit nga Jashtë* pasi nënshkruhet nga anëtarët e GNVJ dhe një kopje e tij dorëzohet tek KNVVJ.

### **IV.3. Procedura për numërimin dhe vlerësimin e dokumentacionit zgjedhur të administruar në Kutinë e Posaçme të Votimit nga Jashtë**

1. Sekretari i GNVJ vendos mbi tavolinën e numërimit *Kutinë e Posaçme të Votimit nga Jashtë* dhe lexon kodet e vulave të sigurisë me të cilat është mbyllur kjo kuti. Verifikohet nëse kodet e vulave të sigurisë janë të njëjta me ato të procesverbalit të mbylljes së kutisë dhe i shënon ato në *Procesverbali i GNVJ për Vlerësimin e Dokumentacionit në Kutinë e Posaçme të Votimit nga Jashtë*. Nëse ka mospërputhje, atëherë GNVJ njofton menjëherë KNVVJ e cila merr vendim për përfshirjen ose jo në numërim të asaj kutie. Kundër këtij vendimi mund të bëhet ankim sipas procedurave të përcaktuara në nenin 124 të Kodit Zgjedhor.



- 2.Pasi hap *Kutinë e Posaçme të Votimit* nga Jashtë sekretari i GNVJ në prani të anëtarëve të tjerë, si dhe të vëzhguesve nxjerr nga kjo kuti dokumentacionin zgjedhor që përmban kjo kuti.
- 3.Nëse gjatë shqyrtimit të këtij dokumentacioni gjenden Zarfa të Jashtëm të cilët përmbajnë Kodin Unik të Zgjedhësit dhe vula në zarfin e postës daton jo më vonë se ora 19:00 e ditës së votimit, atëhere GNVJ e vlerëson këtë dokumentacion sipas parashikimeve të Kreut IV. 2 të këtij akti duke bërë plotësimet përkatëse në *Procesverbalin e GNVJ për Vlerësimin e Dokumentacionit në Kutinë e Posaçme të Votimit nga Jashtë* .
16. Në përfundim të procesit të shqyrtimit të dokumentacionit zgjedhor sipas këtij kreu GNVJ e rifut këtë dokumentacion në *Kutinë e Posaçme të Votimit* nga Jashtë. Kutia mbyllet me vula sigurie me kod. Të dhënat e kodeve të vulave të sigurisë shënohen në *Procesverbalin e GNVJ për Vlerësimin e Dokumentacionit në Kutinë e Posaçme të Votimit* nga Jashtë.
17. *Procesverbali i GNVJ për Vlerësimin e Dokumentacionit në Kutinë e Posaçme të Votimit* nga Jashtë pasi nënshkruhet nga anëtarët e GNVJ një kopje e tij dorëzohet tek KNVVJ.

#### **IV.4. Procedura për numërimin dhe vlerësimin e dokumentacionit zgjedhur gjendur në *Kutinë Rezervë të Votimit nga Jashtë***

- 1.Sekretari i GNVJ vendos mbi tavolinën e numërimit *Kutinë Rezervë të Votimit* nga Jashtë dhe lexon kodet e vulave të sigurisë me të cilat është mbyllur kjo kuti. Verifikohet nëse kodet e vulave të sigurisë janë të njëjta me ato procesverbalit të mbylljes së kutisë dhe i shënon ato në *Procesverbali i GNVJ për Vlerësimin e Dokumentacionit në Kutinë Rezervë të Votimit* nga Jashtë. Nëse ka mospërputhje, atëhere GNVJ njofton menjëherë KNVVJ e cila merr vendim për përfshirjen ose jo në numërim të asaj kutie. Kundër këtij vendimi mund të bëhet ankim sipas procedurave të përcaktuara në nenin 124 të Kodit Zgjedhor.
- 2.Pasi hap *Kutinë Rezervë të Votimit* nga Jashtë sekretari i GNVJ në prani të anëtarëve të tjerë, si dhe të vëzhguesve nxjerr nga kjo kuti dokumentacionin zgjedhor që përmban kjo kuti.
- 3.Nëse gjatë shqyrtimit të këtij dokumentacioni GNVJ konstaton se vula në zarfin e operatorit të shërbimit postar daton jo më vonë se ora 19:00 e datës së zgjedhjeve, atëhere GNVJ e vlerëson këtë dokumentacion sipas parashikimeve të Kreut IV. 2 të këtij akti duke bërë plotësimet përkatëse në *Procesverbalin e GNVJ për Vlerësimin e Dokumentacionit në Kutinë Rezervë të Votimit nga Jashtë*.
- 4.Në përfundim të procesit të shqyrtimit të dokumentacionit zgjedhor GNVJ e rifut këtë dokumentacion në *Kutinë e Rezervë të Votimit* nga Jashtë. Kutia mbyllet me vula sigurie me kod. Të dhënat e kodeve të vulave të sigurisë shënohen në *Procesverbalin e GNVJ për Vlerësimin e Dokumentacionit në Kutinë e Rezervë të Votimit nga Jashtë*.
- 5.*Procesverbali i GNVJ për Vlerësimin e Dokumentacionit në Kutinë e Rezervë të Votimit* nga Jashtë pasi nënshkruhet nga anëtarët e GNVJ një kopje e tij dorëzohet tek KNVVJ.

#### **IV.5 Procedura për numërimin dhe vlerësimin e dokumentacionit zgjedhur gjendur në *Kutinë e Posaçme Rezervë të Votimit nga Jashtë*.**

1. Sekretari i GNVJ vendos mbi tavolinën e numërimit *Kutinë e Posaçme Rezervë të Votimit nga Jashtë* dhe lexon kodet e vulave të sigurisë me të cilat është mbyllur kjo kuti. Verifikohet nëse kodet e vulave të sigurisë janë të njëjta me ato procesverbalit të mbylljes së kutisë dhe i shënon ato në *Procesverbali i GNVJ për Vlerësimin e Dokumentacionit në Kutinë e Posaçme Rezervë të Votimit nga Jashtë*. Nëse ka mospërputhje, atëherë GNVJ njofton menjëherë KNVVJ e cila merr vendim për përfshirjen ose jo në numërim të asaj kutie. Kundër këtij vendimi mund të bëhet ankim sipas procedurave të përcaktuara në nenin 124 të Kodit Zgjedhor.
2. Pasi hap *Kutinë e Posaçme Rezervë të Votimit nga Jashtë* sekretari i GNVJ në prani të anëtarëve të tjerë, si dhe të vëzhguesve nxjerr nga kjo kuti dokumentacionin zgjedhor që përmban kjo kuti.
3. Nëse gjatë shqyrtimit të këtij dokumentacioni gjenden Zarfa të Jashtëm të cilët përmbajnë Kodin Unik të Zgjedhësit dhe vula në zarfin e operatorit të shërbimit postar daton jo më vonë se ora 19:00 e datës së zgjedhjeve, atëherë GNVJ e vlerëson këtë dokumentacion sipas parashikimeve të Kreut IV. 2 të këtij akti duke bërë plotësimet përkatëse në *Procesverbalin e GNVJ për Vlerësimin e Dokumentacionit në Kutinë e Posaçme Rezervë të Votimit nga Jashtë*.
4. Në përfundim të procesit të shqyrtimit të dokumentacionit zgjedhor GNVJ e rifut këtë dokumentacion në *Kutinë e Rezervë të Votimit nga Jashtë*. Kutia mbyllet me vula sigurie me kod. Të dhënat e kodeve të vulave të sigurisë shënohen në *Procesverbalin e GNVJ për Vlerësimin e Dokumentacionit në Kutinë e Rezervë të Votimit nga Jashtë*.
5. *Procesverbali i GNVJ për Vlerësimin e Dokumentacionit në Kutinë e Posaçme Rezervë të Votimit nga Jashtë* nënshkruhet nga anëtarët e GNVJ dhe një kopje e tij dorëzohet tek KNVVJ.

### **KREU V**

#### **LLOJET E VLERËSIMIT TË VOTAVE DHE TABELIMI I REZULTATIT**

##### **V.1. Llojet e vlerësimit të votave**

1. Fletët e votimit ndahen në vota të vlefshme ose në vota të pavlefshme.
2. Vota të vlefshme janë vetëm fletët e votimit, në të cilat është votuar qartësisht vetëm për njërin nga subjektet zgjedhore dhe/ose vetëm për njërin nga kandidatët e tij. Kur është votuar për më shumë se një kandidat të të njëjtit subjekt zgjedhor, vota i llogaritet vetëm subjektit zgjedhor.
3. Krahas sa parashikohet tjetër në këtë akt vota të pavlefshme janë fletët e votimit kur:

- a) fleta e votimit nuk ka të njëjtën madhësi, ngjyrë ose formë me fletën e votimit të miratuar nga KQZ-ja;
- b) në fletën e votimit janë bërë shënime apo shenja që bëjnë të pamundur vlerësimin e votës;
- c) në fletën e votimit janë bërë shënime në favor ose në disfavor të subjekteve të caktuara zgjedhore;
- d) është votuar për më shumë se një nga subjektet zgjedhore në fletën e votimit;
- e) nuk është votuar për asnjë nga subjektet zgjedhore në fletën e votimit;
- f) është votuar për një subjekt zgjedhor dhe për kandidatin e një subjekti tjetër zgjedhor;
- g) nuk është e qartë se për kë është votuar;
- h) zgjedhësi ka votuar për një person apo subjekt që nuk është në fletën e votimit.

## V.2. Tabelimi i rezultatit

1. Të dhënat mbi numrin e votave të subjekteve zgjedhorë dhe të kandidatëve të pasqyruara në *Procesverbalin e GNVJ për Vlerësimin e Dokumentacionit në Kutinë e Votimit nga Jashtë, në Procesverbalin e GNVJ për Vlerësimin e Dokumentacionit në Kutinë e Posaçme të Votimit nga Jashtë, në Procesverbalin e GNVJ për Vlerësimin e Dokumentacionit në Kutinë e Rezervë të Votimit nga Jashtë dhe në Procesverbalin e GNVJ për Vlerësimin e Dokumentacionit në Kutinë e Posaçme Rezervë të Votimit nga Jashtë* për çdo zonë zgjedhore përfshihet nga KNVVJ në Tabelën e Rezultatit të Votimit nga Jashtë të Zonës zgjedhore përkatëse. Kjo tabelë nënshkruhet nga të gjithë anëtarët e KNVVJ dhe më pas i dorëzohet KQZ.
2. KQZ përfshin të dhënat e Tabelës së Rezultatit të Votimit nga Jashtë të Zonës zgjedhore në Tabelën Përmbledhëse të Rezultatit të Zonës Zgjedhore përkatëse.

## KREU VI

### MONITORIMI DHE VËZHGIMI I PROCESIT

1. Çdo subjekt zgjedhor ka të drejtën e caktimit të një vëzhguesi për çdo tavolinë numërimi. Këtë të drejtë e ka edhe cdo organizatë vendase, apo e huaj e cila ka marrë akreditimin për vëzhgimin e zgjedhjeve nga KQZ.
2. Vëzhguesit kanë të drejtë të marrin kopje të Tabelës së Rezultatit të Votimit nga Jashtë të Zonës Zgjedhore.

## KREU V II

### DISPOZITA TË FUNDIT

1. Ngarkohet administrata e KQZ dhe institucionet e ngarkuara me detyra nga ky vendim, me zbatimin e tij.
2. Ky vendim hyn në fuqi menjëherë dhe publikohet në faqen zyrtare të internetit të Komisionit Qendror të Zgjedhjeve.
3. Kundër këtij vendimi mund të bëhet ankim në Kolegjin Zgjedhor Gjyqësor pranë Gjykatës Administrative të Apelit, Tiranë, brenda (5) ditëve nga shpallja e këtij vendimi.

**Komisioneri Shtetëror i Zgjedhjeve**

**Iirjan CELIBASHI**